



Lugo, a 24 de outubro de 2011. ADEGA-Lugo presentou hoxe en rolda de prensa o seu Programa de Roteiros anual 2011-2012, baixo o título **ROTEIROS POLA GALIZA MÁXICA. UN PAÍS DE LENDAS**

. Este ciclo de roteiros pretende divulgar e poñer en valor o carácter místico ou fantástico dos lugares ou elementos que adquiriron un significado diferente e único ao longo dos tempos, segundo lles foi determinado polas crenzas e costumes dos nosos devanceiros, nun intento de comprender a contorna ou o mundo circundante. Pero estes elementos están a desaparecer diariamente, entre outros motivos, por mor da intervención humana sobre o territorio, ao cal están ligados. Por iso ADEGA-Lugo quere chamar a atención sobre este patrimonio inmaterial e tradición oral que debemos conservar e poñer en valor fronte a desmemoria e a destrución territorial. Descarga aquí o

[PROGRAMA ROTEIROS 2011-2012](#)

Pedras, mares, corredoiras, cumios, vales, fontes, árbores, covas, etc., son algo máis que elementos naturais e paisaxísticos, son seres míticos, máxicos e fantásticos que corresponden a un intento de comprender o mundo ao longo dos tempos. Innumerables lendas, personaxes mitolóxicos ou recunchos máxicos persisten aínda na nosa xeografía, mais **pouco a pouco van esmorecendo**

na nosa memoria e no noso presente, ben sexa pola desaparición do elemento máxico e natural de referencia, ben pola ausencia de fontes vivas de información ou ben porque a propia tradición oral se vai reconstruíndo e actualizando.

Porén, **a destrución do territorio físico** de Galiza está a contribuír de xeito especial a esta perda dos elementos míticos de Galiza e, por ende, do noso imaxinario cultural. As alteracións que día a día sofre o noso territorio, non só contribúen a diminuír os recursos naturais ou a biodiversidade propia do país, senón que tamén eliminan o espazo no que se crean e trasladan de xeración en xeración as crenzas populares, os cultos pagáns e relixiosos, as lendas, ou a consciencia dos lugares míticos.

Por tanto, o territorio natural é tamén un territorio máxico, dous territorios que, na meirande parte dos casos, conflúen en **dous espazos interdependentes** e destinados a vivir ou a

morrer ao mesmo tempo, de xeito que, se un deles desaparece, o outro ten poucas posibilidades de permanecer. É por iso que ADEGA-Lugo, no marco da súa

campaña a prol da defensa do territorio

, quere contribuír de forma activa a que os galegos e galegas coñezan estes elementos naturais e máxicos presentes aínda na nosa xeografía e na nosa memoria colectiva como testemuñas dunha visión particular do mundo.

ADEGA-Lugo pretende divulgar e poñer en valor algunhas das lendas e tradicións de Galiza a través do seu ciclo anual de ROTEIROS 2011-2012, baixo o título: **ROTEIROS POLA GALIZA MÁXICA. UN PAÍS DE LENDAS**

PROGRAMA DE ROTEIROS ADEGA-LUGO 2011-2012

Data

Situación

Lugar da lenda

Título

30 outubro

O Courel

Valdas Mouras

Labirinto encantado de penedos e castiñeiros...

27 novembro

Outeiro de Rei

Penas de Rodas

Trabe de ouro trabe de alcatrán ..

18 decembro

Ancares - Doiras-Cervantes

Cerva Branca de Cervantes

O anel de Aldara...

29 xaneiro

Friol

A Cova da Serpe

A forza do amor...

26 febreiro

Ribeira Sacra

Cabo do Mundo

Encoro de Santo Estevo

O lar das Xacias....

25 marzo

Barreiros

Monte da Cornería

O tesouro de Maeloc ..

22 abril

Touriñán

Monte Cachelmo

Os cantos de Buserán...

20 maio

Costa da Morte

Monte Pindo

Dominios da Rainha Lupa...

17 xuño

Gondomar-Vigo- Pontevedra

Serra do Galiñeiro

Porta de acceso ao Alén...

Lugar de saída: Avenida de Ramón Ferreiro (fronte a Escola de Maxisteiro), Lugo.

Hora de saída: ás 9.00 horas, agás nos roteiros de abril, maio e xuño que será ás 8.00 horas.

Prezos: 15 € (non socios/as), 12 € (estudantes, parados, xubilados), 10€ (socios/as) e 5€ (menores de 17 anos).

Reserva de praza. Chamar a: 982240299 ou 679113718, polo menos con dous días de antelación.